

Aladin Husić, PRILOZI ZA HISTORIJU GRADA TEŠNJA, Centar za kulturu i obrazovanje, Tešanj, 2107., 142 str.

Tešanj *grad biser i grad simbol jednog vremena* ovih dana dobio je još jednu publikaciju čiji sadržaj predstavlja značajan pomak u rasvjetljavanju povijesti ovoga grada. Riječ je o knjizi *Prilozi za historiju grada Tešnja* autora dr. Aladina Husića, višeg naučnog saradnika u Orijentalnom institutu u Sarajevu. Dr. Husić se već duži period kontinuirano i sistemski bavi historijom Tešnja i do sada je objavljenim radovima, učešćem na znanstvenim skupovima i uređivanjem publikacija koje se odnose na historiju Tešnja dao značajan doprinos u proučavanju nastanka i razvoja ovoga grada, posebno u prvim stoljećima osmanske uprave.

Knjiga *Prilozi za historiju grada Tešnja* predstavlja, zapravo, ranije objavljene radove okupljene na jednom mjestu. Nakon uvodnog dijela u kojem autor iznosi genezu nastanka ove knjige i svakog rada pojedinačno, nalazi se rad *O imamskoj službi u tvrđavama Bosanskog sandžaka u 15. i prvoj polovini 16. vijeka.* (str. 12-50).

Centralno mjesto knjige zauzimaju dvije studije: *Tešanj u 16. stoljeću : Od puste varoši do značajne kasabe* (str 51-73) i *Tešanjski vakufi : S posebnim osvrtom na novčane vakufe* (str. 74-108). Oba rada predstavljaju izvorne naučne radove utemeljene na primarnim historijskim izvorima; vakufnamama, sidžilima i popisnim defterima. Činjenica da su ovi radovi ranije publikovani u časopisima ne umanjuje njihovu aktualnost i značaj u daljem pručavanju historije bosanskohercegovačkih gradova.

Rad na pripremi za štampu *Sidžila tešanskog kadiluka* u svojstvu urednika izdanja, bez mogućnosti uvida u original koji je uništen u paljevini Orijentalnog instituta, još je jedna potvrda u kojoj mjeri dr. Aladin Husić kompetentno i na stručnom nivou vlada primarnim izvorima osmanske provenijencije, što će se potvrditi i kasnije u njegovom angažmanu na uređivanju i izdavanju sidžila drugih gradova iz Bosne i Hercegovine. Ovdje je objavljen prikaz *Sidžila tešanskog kadiluka* koji je prevela i obradila Hatidža Čar-Drnda, a izdao Orijentalni institut u Sarajevu.

Doprinos Adema Handžića bosanskohercegovačkoj osmanistici i historiografiji, predstavlja izlaganje koje je autor prezentirao na naučnom skupu o Ademu Handžiću održanom 15. i 16. decembra 2006. godine u Tešnju. I u ovom radu autor temeljito, argumentovano i sistematično govori o bosanskohercegovačkoj historiografiji i osmanistici svrstavajući dr. Adema Handžića u najelitnije društvo naših historičara i osmanista.

Na kraju knjige, a prije osnovnih informacija o autoru, nalazi se *Pogovor* u kojem dugogodišnja direktorica Orijentalnog instituta dr. Behija Zlatar, i

sama historičar i osmanista, govori o osnovnim značajkama svakog od radova pojedinačno, ujedno valorizujući dosadašnji znanstveni rad dr. Aladina Husića na polju proučavanja historije Bosne i Hercegovine pod osmanskim upravom.

O. Lavić